



PENGUAT KUASA Jabatan Imigresen Melaka melakukan proses dokumentasi warga asing di sebuah tapak pembinaan di Kota Laksamana. - Gambar ihsan Jim

Serbu 'kampung' Pati

134 warga asing diperiksa, 52 ditahan gagal kemuka dokumen sah

Oleh Nuraliawati Sabri
am@hmetro.com.my

Melaka

Jadikan lokasi tapak pembinaan di Kota Laksamana di sini, sebagai 'perkampungan' haram. Itu antara kegiatan dilakukan 52 pendatang tanpa izin (Pati) yang terus tinggal di negeri ini secara tidak sah.

Tindakan 52 warga asing itu bagaimanapun dibongkar pihak Jabatan Imigresen Melaka (JIM) yang melakukan operasi Op Sapu kira-kira jam 1.30 pagi semalam.

Rata-rata pendatang asing terbabit tidak sempat melarikan diri berikutan kebanyakannya mereka sedang nyenyak tidur.

Pengarah JIM Melaka, Anirwan Fauzee Mohd Anini berkata, serbuan itu dilaku-

kan hasil aduan awam dan risikan dilakukan membabitkan kebanyakan warga asing di kawasan itu selain mengesan individu yang cuba melindungi pendatang asing dengan mengaut keuntungan.

Beliau berkata, dalam serbuan itu, seramai 134 pekerja warga asing diperiksa JIM dan hasilnya 52 lelaki ditahan selepas gagal mengemukakan dokumen perjalanan yang sah memasuki negara ini.

"Mereka yang ditahan membabitkan 41 warga Bangladesh dan 11 warga Myanmar berusia 25 hingga 45 tahun.

"Hasil dokumentasi dilakukan mendapati ada di antara mereka ini

tiada dokumen pengenalan diri, tinggal lebih masa dan pas lawatan kerja sementara tamat tempoh serta beberapa lagi kesalahan," katanya.

Menurut beliau, pihaknya terlebih dahulu mengepung lokasi itu lebih awal bagi mengelakkan Pati bertindak melarikan diri ke kawasan semak dan pantai berhampiran.

"Semua yang ditahan juga disyaki tinggal di situ dan bekerja sebagai buruh pembinaan di kawasan sekitar walaupun tidak mempunyai dokumen yang sah," katanya.

Anirwan berkata, pihaknya mendapati majikan gagal menye-

diakan penempatan selaras dengan peraturan Akta Pencegahan dan Pengawalan Penyakit Berjangkit 1988 (Akta 342).

"Kami mendapati tempat tinggal pekerja warga asing ini berada dalam keadaan sesak dan persekitaran kotor berisiko terdedah kepada penyakit berjangkit," katanya.

Mengulas lanjut beliau berkata, semua yang ditahan akan diasiat mengikut Akta Imigresen 1959/63 dan satu Saman Saksi turut dikeluarkan kepada wakil majikan untuk membantu siasatan.

"Mereka yang ditahan akan dibawa untuk jalani ujian saringan Covid-19 terlebih dahulu sebelum dihantar ke Depot Tahanan Imigresen untuk tindakan lanjut," katanya.

Mereka ditahan membabitkan 41 warga Bangladesh dan 11 warga Myanmar